

НЕДЕЛЯ ПЯТАЯ ПО ПАСЦЕ.

Самаряныни.

НА ВЕЛИЦЕЙ ВЕЧЕРНИ,

На Господи воззвах: поставим стихов 10. И поем стихиры воскресны 3, и восточну 1. И Преполовению подобны 3. И самаряныни самогласны 3.

Стихиры воскресны, глас 4-й:

Животворящему Твоему кресту, непрестанно кланяющееся, Христе Боже, тридневное Воскресение Твое славим. тем бо обновил еси истлевшее человеческое естество, Всесильне, и иже на Небеса восход обновил еси нам, яко един Благ и Человеколюбец.

Древа преслушания запрещение разрешил еси, Спасе, на древе крестнем волею пригвоздився, и во ад сошед Сильне, смертныя узы яко Бог растерзал еси. Темже кланяемся еже из мертвых Твоему Воскресению, радостию вопиюще: Всесильне Господи, слава Тебе.

Врата адова сокрушил еси, Господи, и Твоею смертию смертное царство разрушил еси, род же человеческий от тления свободил еси, живот и нетление миру даровав, и велию милость.

Ина стихира, восточна.

Приидите воспоим людие Спасово тридневное Востание, имже избавихомся адовых нерешимых уз, и нетление и жизнь вси восприяхом, зовуще: распныйся и погребыйся, и воскресый, спаси ны Воскресением Твоим, едине Человеколюбче.

И стихиры Преполовения 3, глас тойже.

Подобен: Господи, возшед на крест:

Наста Преполовение дней от Спасительнаго начинаемых Возстания, Пятидесятницею же Божественною печатаемое, и светится, светлости обоюду имущее и соединяющее обоя, и приити славе предъявляющее, Владычняго Вознесения предпочитает.

Слыша и возвеселися Сион, благовестившуся Христову Воскресению, вернии же его сынове возрадовахся, сего видевшие, омывающа духом скверну христуубийства, готовится, торжествующе, обоих веселое Преполовение.

Приблизися Божественнаго изобильное излитие на всех якоже написася, Духа: Предъзаконение проповедует преполовившееся, по Христове смерти, и погребении, и Воскресении, от Него данну сущу учеником неложному обещанию Утешителево показующу явление.

И самаряныни самогласны 3, глас 1-й:

На источник пришел еси, Источниче чудес, в шестый час, Евин уловити плод: Ева бо в той изыде из рая, прелестию змиевою. Приблизибося самаряныня почерпсти воду, юже виде в рече Спас: даждь ми воду пити, и Аз воды текущая насыщу тя. И во град текши целомудренная, народом возвести абие: приидите видите Христа Господа, Спаса душ наших.

Глас 2-й:

На студенец яко прииде Господь, самаряныня моляше Благоутробнаго: подаждь ми воду веры, и прииму купельныя воды, радование и избавление. Животодавче Господи, слава Тебе.

Собезначальный и Присносущный Сын и Слово Отчее, на источник прииде, Источник исцелений, и жена от Самарии прииде почерпсти воду, яже видево рече Спас: даждь ми воду пити, и шедши пригласи твоего мужа. Она же яко человеку глаголющи, а не Богу, утаити тщашеся, глаголаше: не имам мужа. И Учитель к ней: истину рекла еси, не имам мужа: пять бо имела еси, и егоже имаша, несть твой муж. Она же о глаголе удивившися, и во град текши, народом вопияше, глаголюще: приидите видите Христа, Иже дарует миру велию милость.

Слава, глас 6-й:

При студенце Иаковли обрет Иисус самаряныню, просит воду от нея, облаками покрывай землю. О чуде! Иже херувимы носимый, блуднице жене беседоваше, воды прося, Иже на водах землю повесивый, воды иский, Иже источники и езера вод изливаяй, хотя привлеци сию воистинну, уловяему от сопостата врага, и напоити ю водою живою, палимую в безместных люте, яко Един Благоутробный и Человеколюбец.

И ныне, Богородичен, глас 4-й:

Иже Тебе ради Богоотец пророк Давид песенно о Тебе провозгласи величия Тебе сотворшему, предста Царица одесную Тебе, Тя бо Матерь, Ходатаицу живота показа, без отца из Тебе вочеловечитися благоволивый Бог, да Свой паки обновит образ, истлевший страстьми, и заблудшее горохищное обрет овча, на рамо восприим, ко Отцу принесет, и Своему хотению, с Небесными совокупит Силами, и спасет, Богородице, мир Христос, имеяй велию и богатую милость.

Вход. Прокимен дне. На литии стихира храма.

Слава, и ныне, глас 3-й:

Да радуется днесь светло небо и земля, зане Христос явился воплощаемь яко Человек, да Адама измет от клятвы всеродных, и удивляется чудеса в Самарию пришед: жене же предста воды прося, облака водами одеваый. Темже вси вернии покланяемся нас ради волею Обнищавшему, благоутробным Советом.

На стиховне стихира воскресна, глас 4-й:

Господи, возшед на крест, прадедную нашу клятву потребил еси, и сошед во ад, яже от века узники свободил еси, нетление даруя человеческому роду. Сего ради поюще, славим животворящее и спасительное Твое Восстание.

И прочая стихиры Пасце, глас 5-й:

Стих: Да воскреснет Бог и расточатся врази Его.

Пасха священная нам днесь показася: * Пасха нова святая: * Пасха таинственная: * Пасха всечестная: * Пасха Христос Избавитель: * Пасха непорочная: * Пасха великая: * Пасха верных: * Пасха, двери райския нам отверзающая: * Пасха, * всех освящающая верных.

Стих: Яко исчезает дым, да исчезнут.

Приидите от видения, * жены благовестницы, * и Сиону рцыте: * приими от нас радости благовещения * Воскресения Христова: * красуйся, ликуй * и радуйся, Иерусалиме, * Царя Христа узрев из гроба, * яко жениха происходяща.

Стих: Тако да погибнут грешницы от Лица Божия, а праведницы да возвеселятся.

Мироносицы жены, * утру глубоку * предсташа гробу Живодавца, * обретоша Ангела * на камени сядяща, * и той, провещав им, * сице глаголаше: * что ищите Живаго с мертвыми? * Что плачете Нетленного во тли? * Шедше, * проповедите учеником Его.

Стих: Сей день, егоже сотвори Господь, возрадуемся и возвеселимся в онь.

Пасха красная, * Пасха, Господня Пасха! * Пасха всечестная нам возсия. * Пасха! * Радостно друг друга обыдем. * О Пасха! * Избавление скорби, * ибо из гроба днешь, * яко от чертога, * возсияв Христос, * жены радости исполни, глаголя: * проповедите апостолом.

Слава, глас 8-й:

Егда явился еси во плоти Христе Боже, за неизреченное смотрение, слышавши самаряныня слово Тебе Человеколюбца, остави почерпало у студнца, и тече глаголющи сущим во граде: приидите видите Сердцеведца, еда Сей есть чаемый Христос, имеяй велию милость?

И ныне, глас 5-й:

Воскресения день, * и просветимся торжеством, * и друг друга обыдем. * Рцем: братие, * и ненавидящим нас * простим вся Воскресением * и тако возопиим: * **Христос воскрес из мертвых, смертию смерть поправ и сущим во гробех живот даровав.**

И прочая вся, яко предписана в прочих неделях.

Отпустительный тропарь, глас 4-й:

Светлую Воскресения проповедь * от Ангела уведевше Господи ученицы, * и прадеднее осуждение отвергну, * апостолом хвалящаяся, глаголаху: * исповержеся смерть, * воскрес Христос Бог, * даруяй мірови велию милость.

Слава и ныне, праздника, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Аще несть бдения, на полунощнице канон Святых и Животворящей Троице, во Октоихе, гласа 4-го.

Таже Достойно есть: и прочая.

НА УТРЕНИ

На Бог Господь, тропарь воскресен, глас 4-й:

Светлую Воскресения проповедь * от Ангела уведевше Господи ученицы, * и прадеднее осуждение отвергну, * апостолом хвалящаяся, глаголаху: * исповержеся смерть, * воскресе Христос Бог, * даруй мирowi велию милость. [Дважды]

Слава и ныне, праздника, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

По 1-м стихословии седален, глас 4-й:

Возревше на гробный вход, и пламене ангельскаго не терпяще муроносицы, с трепетом дивляхуся глаголюще: еда украдеса, Отверзый разбойнику рай? Еда ли воста, Иже и прежде страсти проповедавый Востание? Воистинну воскресе Христос, сущым во аде подая живот и Воскресение.

Стих: Воскресни Господи Боже мой, да вознесется рука Твоя * не забуди убогих Твоих до конца.

Подобен: Скоро предвари:

Воскресл еси яко Безсмертный, от гроба Спасе, совоздвигл еси мир Твой силою Твоею Христе Боже наш, сокрушил еси в крепости смерти державу, показал еси Милостиве Воскресение всем. Темже Тя и славим Еди́не Человеколюбче.

Слава и ныне, Богородичен, глас 4-й:

Еже от века утаенное, и ангелом несведомое таинство: Тобою Богородице сущым на земли явился Бог, в неслитном соединении воплощаемь, и крест волею нас ради восприим, имже воскресив первозданнаго, спасе от смерти души наша.

По 2-м стихословии седален, глас 4-й:

Подобен: Удивися Иосиф:

С горних высот спешд Гавриил, и каменю приступль, идеже Камень жизни, белоносый взываше к плачущым: престаните вы от рыдания вопля, имеющыя и ныне милостивное: Егоже бо ищите плачуще, дерзайте, яко воистинну востал есть. Темже возопийте апостолом, яко воскресе Господь.

Стих: Исповемся Тебе Господи всем сердцем моим, * повем вся чудеса Твоя.

Вольным Твоим советом крест претерпел еси Спасе, и во гробе новем положиша Тя человецы смертнии, словом концы Составльшаго. Темже связан бысть чуждый, смерть люто пленяшеся, и сущии во аде вси взываху живоносному Востанию Твоему: Христос воскресе, Жизнодавец пребываяй во веки.

Слава и ныне: Богородичен, самогласен:

Удивися Иосиф, еже паче естества зря, и внимше мыслию иже на руно дождь, в безсеменном зачатии Твоем, Богородице, купину огнем неопалимую, жезл Ааронов прозябший, и свидетельствуя обручник Твой и хранитель, священником взываше: Дева раждает и по Рождестве паки Девою пребывает.

По Блажени непорочнии: глаголем тропари воскресны: Благословен еси Господи: во глас 5-й: Ангельский собор: и прочее.

И абие ипакои, глас 4-й:

Яже Твоего преславнаго Востанія, предтекшья мѣроносицы, апостолом проповедаху Христе, яко воскресл еси яко Бог, подай мірови велию милость.

И абие степенны, глас 4-й:

Антифон 1:

От юности моя мнози борют мя страсти, но Сам мя заступи и спаси Спасе мой.

Ненавидящии Сиона, посрамитесь от Господа: яко трава бо огнем будите
изсохше.

Слава: Святым Духом всяка душа живится, и чистотою возвышается, светлеется
Троическим единством священнотайне.

И ныне, тойже.

Антифон 2:

Воззвах Тебе Господи тепле из глубины души моя, и мне да будут на послушание Божественная Твоя ушеса.

На Господа надежду всяк кто стяжав, вышший есть всех скорбящих.

Слава: Святым Духом точатся благодатныя струи, напаяюще всяку тварь ко оживлению.

И ныне, тойже.

Антифон 3:

Сердце мое к Тебе, Слове, да возвысится, и да ничтоже усладит мя от мірских красот на слабость.

К матери своей якоже имать кто любовь, ко Господу тепльше люблением
должны есмы.

Слава: Святым Духом, боговедения богатство, зрения и премудрости: вся бо в Сем Отеческая веления Слово открывает.

И ныне, тойже.

Прокимен, глас 4: Воскресни, Господи, помози нам и избави нас * Имене
Твоего ради.

Стих: Боже, ушима нашими услышахом, и отцы наша возвестиша нам.

Таже: Всякое дыхание

Евангелие от Иоанна утреннее 7

Ài àðàìy ìí, ài ààèíó ìò ñóááìò, Ìàðèà Ìààààèèà ìðèèää çàòòðà, àùà ñòuè òùìà, ìà àðíá, è àèää èàìáü àçyò ìò àðíáà: Òà÷à óái è ìðèèää è Ñèííó Ìàòðó, è è àðóáííò ó÷áíèéó, àìíàà èpáèyòà Èèñón, è àèàáíèà èìà: àçyòà Áíñííàà ìò àðíáà, è ìá àái, ààà ñíèìàèòà àái. Èçúää æà Ìàòð, è àðóáèé ó÷áíèé, è èäyñòà èì àðíáo. Òà÷àñòà æà ìáà àèóíà: è àðóáèé ó÷áíèé òà÷à ñèíðàà Ìàòðà, è ìðèèää ìðàæàà èì àðíáo. È ìðèèéè àèää ðèçú èàæàüy, ìáà÷à ìá àíèää. Ìðèèää æà Ñèíí Ìàòð à ñèää àái, è àíèää àì àðíá, è àèää ðèçú ààèíü èàæàüy: È ñóààðü, èæà áà ìá àèààà Áái, ìá ñ ðèçàìè èàæàüü, ìí ìííáü ñàèò ìá ààèíü ìáñòà. Òíààà óái àíèää è àðóáèé ó÷áíèé, ìðèèääüé ìðàæàà èì àðíáo, è àèää, è ààðíáà. Ìá óái ààäyóò ìèñàìèy, yèì ñíáíààò Áíó èç ìàðòàüò àíñèðàñíóòè. Èäíñòà æà ìàèè è ñààà ó÷áíèèà.

Воскресение Христово: [Трижды.], Псалом 50. И прочее.

Таже каноны: Пасце со ирмосы и Богородичны на 6: Преполовению на 4: и самаряныни на 4.

Канон Пасхи, глас 1-й:

Песнь 1.

Ирмос: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Припев: Христос воскрес из мертвых.

Очистим чувства * и узрим неприступным светом Воскресения * Христа блистающая, * и радуйтесь рекуща, * ясно да услышим, * победную ноюще.

Небеса убо достойно да веселятся, * земля же да радуется, * да празднует же мир, * видимый же весь и невидимый: * Христос бо воста, веселие вечное.

Иный канон Богородичен:

Умерщвления предел сломила еси, вечную жизнь рождающая Христа, из гроба возсиявшего днесь, Дево Всенепорочная, и мир просветившаго.

Воскресшаго видевши Сына Твоего и Бога, радуйся со апостолы Богоблагодатная Чистая: и еже радуйся первее, яко всех радости вина, восприяла еси, Богомати Всенепорочная.

Другий канон Преполовению. Глас 8-й:

Ирмос: Море огустил еси ...,

Языцы восплещите, евреи восплачите, Животодавец бо Христос, узы адовы расторже, и мертвые воскреси, и недуги исцели словом: сей есть Бог наш, Давый жизнь верующим во Имя Его.

Чудо показал еси, воду в вино прешедшую, во Египте реки преложивый Владыко в кровь, и мертвые воскресил еси, знамение сие второе скончав. Слава Спасе, несказанному Твоему совету: слава истощанию Твоему, имже обновил еси нас.

Струя приснотекущая сый Господи жизни истинная, Ты еси Воскресение наше, хотя трудился еси Спасе мой, и волею вжадался еси, законом естества повинуюся, и в Сихарь шед плотию, воды просил еси у самаряныни пити.

Богородичен: **Е**дина вместила еси Зиждителя Твоего, Богородительнице, во чреве, и плотию родила еси Неизреченного, и Дева пребыла еси, ничтоже девству осквернившися. Сего Чистая яко Сына Твоего и Бога, непрестанно моли о стаде Твоем присно.

Ин, канон самаряныни. Творение Иосифово. Глас 1.

Ирмос: Поразитель Египта, и фараона мучителя погрузивый в мори, люди спас еси из работы Моисейски поющия песнь победную: яко прославися.

Погребенный воста, Собою воздвиже род человеческий: да радуется тварь вся, и мышлении днесь облацы да кропят правду яве.

Крест вольный плотию приим, тридневен воскресл еси от мертвых, адова сокровища Живоначалниче Господи истощив, и извед окованныя души.

Зраком блистающая муриносицы видевше ангела, страхом бежаша от гроба: Христово же Востание уведевше, и возвестити тщатся учеником.

Покрываяй водами превыспренняя Господи, Вода жизни Сый, самаряныне, просящей Твоея честныя воды, подал еси разумевшей благоутробие Твое.

Слава, Троицен: **О** Троице, верою Тя чистою славящих, Отче, Сыне и Душе, яко Творец всех спасай, и очищение даруй нам грехов, яко Препоблагий.

И ныне, Богородичен: **Р**адуйся, Престоле огненный. Радуйся, Свещниче всезлатый. Радуйся, света Облаче. Радуйся, Палато Слова, и умная Трапезо, Хлеб жизни достойно Христа носившая.

Катавасия: Воскресения день ...,

Песнь 3.

Ирмос: **П**риидите, пиво пием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Ныне вся исполнишася света, * небо же и земля, и преисподняя: * да празднует убо вся тварь * востание Христово, * в немже утверждается.

Вчера спогребохся Тебе, Христе, * совостаю днесь воскресшу Тебе, * сраспинахся Тебе вчера. * Сам мя спрослави, Спасе, * во Царствии Твоем.

Богородичен:

На нетленную жизнь прихожду днесь благостию Рождшагося из Тебе Чистая, и всем концем свет облиставшаго.

Бога Егоже родила еси плотию, из мертвых, якоже рече, воставша видевши Чистая, ликуй, и Сего яко Бога Пречистая возвеличай.

Ин. Преполовению

Ирмос: **У**твердися сердце мое во Господе ...,

Не иже на лице суд судите иудее, учя глаголаше Владыка, егда прииде во святилище, якоже писано есть, преполовившуся законному празднику.

Не иже на лице суд судите иудее: Христос бо прииде, Егоже нарицаху пророцы, от Сиона грядуща, и мир взывающа.

Аще и словесем не веруте иудее, делом веруйте Владыки: что прельщаетесь, отметающесе Святаго, егоже написа в законе Моисей?

Богородичен: **Е**дин от Троицы Сый быв, плоть виделся еси не преложь Господи Существа, ниже опалив Рождшия нетленное чрево, Бог сый весь и Огнь.

Ин. самаряныни.

Ирмос: **У**твердися сердце мое в Господе, дающем молитву молящемуся, яко лук сильных изнеможе, и немощствующии препоясашеся силою.

Волею на древо вознеслся еси Слове, и зрящее распадохся камене, и тварь преклоняшесе вся, и мертвии из гробов, якоже от сна востаху.

С душою Тя пришедша ко аду, Слове, видевши вся души праведных, от вечных уз отрешахуся, песнословяще яже паче ума силу Твою.

Что чудитесь? Что во гробе вы ищете с мвром жены, Владыку? Воста, и мир совоздвиже, ангел блистайся мвроносицам вещаще.

Жизнь сый Господи, и Источник безсмертия, сел еси при источнице Щедре, и Твоих премудрых вод исполнил еси самаряныню просящую, и поющую Тя.

Слава, Троицен: Един над всеми в Троице Бог поется, Отец и Сын и Божественный Дух, Егоже страхом славят Небеснии чинове, ясно вопиюще: Свят, Свят, Свят еси Господи.

И ныне, Богородичен: Несказанно зачепши во утробе Твоей всех Бога, Дево Мати, паче мысли и слова родила еси, пребывши Дева яко прежде Рождества, Богоневесто.

Катавасия: Приидите, пиво прием новое ...,

Кондак Преполовению глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. Олядевшую ми душу согрешенми и беззаконии, кропленьми Твоих кровей напой, и покажи плодоносу добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подавая Благии иже с высоты сошедшую воистину учеником Твоим Духа крепость, Тебе Бога ведящим, Ты бо еси источник животу нашему.

Седален самаряныни, глас 4:

Подобен: Вознесыйся:

Да радуется небо, да ликовствует земная, яко Христос от Девы явився яко Человек, избави из тления все человечество Своею смертию: чудеса же возсиявый жене самаряныне воды просящей, подает источник исцелений, яко Един Безсмертен.

Слава, и ныне: глас 4. Подобен:

Премудрости Подателю и Владыко, празднику законному предстал еси, во святилищи сед учил еси, глаголя сице всем: грядите жаждущии, пийте воду, юже Аз ныне подаю, еюже жизни от Бога и пищи насладитесь вси человецы.

Песнь 4.

Ирмос: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Мужеский убо пол, * яко разверзый девственную утробу, * явился Христос: * яко человек же, * Агнец наречеся: * непорочен же, * яко невкусен скверны, * наша Пасха, * и яко Бог истинен * совершен речеся.

Яко единоклетный агнец, * благословенный нам венец Христос, * волею за всех заклан бысть, * Пасха чистительная, * и паки из гроба красное * правды нам возсия Солнце.

Богоотец убо Давид, * пред сенным ковчегом * скакаше играя, * людие же Божии святии, * образов сбытие зряще, * веселимся Божественно, * яко воскрес Христос, * яко Всесилен.

Богородичен тойже:

Создавший Адама Твоего праотца Чистая, зиждется от Тебе, и смертное жилище разори Своею смертию днесь, и озари вся Божественными блистаньми Воскресения.

Егоже родила еси Христа, прекрасно из мертвых возсиявша Чистая зрящи, добрая и Непорочная в женах и красная, днесь во спасение всех, со апостолы радующися Того прославляй.

Ин. Преполовению

Ирмос: Пророк Аввакум ...,

Аще мессии подобает приити, Мессия же Христос есть: беззаконнии, что не веруете Ему? Се прииде, и свидетельствует, яже Той творит: воду вино сотвори, разслабленного словом стягну.

Не разумеюще писаний прельщаетесь вси вы, евреи беззаконии: воистинну бо прииде Христос и всех просвети, и в вас показа многая знамения и чудеса, и всеу отрицаетесь Истинного Живота.

Едино дело показав вам, и вси уже дивитесь, зывавше иудеом Христос. Вы обрезуете и в субботу человека, рече: Мене же что оклеветаете прочее, Воздвигшаго словом разслабленного?

Дела сотворих многая, и коего ради дела камением бьете Мя, иудеом Христос обличая зывавше? Еда зане человека здрава всего словом сотворих? Не судите на лице человецы.

Ин. самаряныни.

Ирмос: Услышах Боже слух Твой, и убояхся, разумех дела Твоя, и ужасохся, Господи: яко Твоего хваления исполнь земля.

Небеса да веселятся, да празднует тварь вся, воста Господь, и явился всем премудрым апостолом Своим.

Пожерта бысть смерти твоя сила, Христу умершу, мертвии яко от чертогов, востанием Сего от гробов изыдоша.

Что рыдаете, о жены? Что с муры ищете Безсмертного? Воста, якоже рече, муриносицам глагола ангел.

Самаряныни Господи, просившей подал еси воду, ведение державы Твоея: темже во веки не вжаждет воспевающи Тя.

Слава, Троицен: О Троице Пресущная, Отче и Слове, и Божественный Душе, Единосильне, Собезначальне! Спаси нас всех верою воспевающих Тя.

И ныне, Богородичен: Неопалимую купину Тя законоположитель, зряше древле, Даниил же гору святую смотряше, едина Дево Мати Владычице.

Катавасия: На Божественной стражи ...,

Песнь 5.

Ирмос: Утреннем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияюща.

Безмерное Твое благоутробие, * адовыми узами содержимии зряще, * к свету идяху, Христе, * веселыми ногами, * Пасху хваляще вечную.

Приступим, священоснии, * исходящу Христу из гроба, яко жениху, * и спразднуем любопразднственными чинми * Пасху Божию спасительную.

Богородичен:

Просвещается Божественными лучами и живоносными Воскресения Сына Твоего, Богоматери Пречистая, и радости исполняется благочестивых собрание.

Не разверзл еси врата девства в воплощении, гроба не разрушил еси печатей Царю создания: отонудуже воскресшаго Тя зрящи Мати, радовашеся.

Ин. Преполовению

Ирмос: Господи Боже наш, мир:

Чудеса украсил еси апостолы Твоя, дивесы возвеличил еси ученики, во всем мире прославив Спасе наш, и дав им Царствие Твое.

Вся просветиша земли концы ученицы, чудесы и ученьми, и различными образы слово проповедавшие, Христе Спасе, Царствия Твоего.

Хвалу возсылаем Царствию Твоему, пение же Тебе приносим, нас ради на земли явившемуся, и мир просветившему, и Адама воззававшему.

Богородичен: Бысть чрево Твое святая трапеза, имущая Небесный Хлеб: от Негоже всяк ядый не умирает, якоже рече всех Богородительнице, Питатель.

Ин. самаряныни.

Ирмос: Возсияй ми Господи свет повелений Твоих, яко к Тебе дух мой утренюет, и поет Тя: Ты бо еси Бог наш, и к Тебе прибегаю, Царю мира.

Гроб Твой святой достигше уранше муроносицы, блистающая видеша юношу и ужасошася, Твоему научившемуся Востанию Христе.

Смерть умертвися, ад пленися, сущии во узах свободишася Христовым Воскресением, возрадуемся и руками восплещим, празднующе светло.

Апостоли възиграйте, и ангели ликуйте, земнороднии вси возрадуйтеся: Господь воскрес, тля испровержеся, и печаль преста, и ликовствует Адам.

Источник сый Господи Жизни, воду оставления и разумения даровал еси, жене просившей древле самаряныне. Темже воспеваем неиреченныя щедроты Твоя.

Слава: Единицу Троицостасную, Троицу Единосущную, Отца Слова и Духа Святаго, Нераздельна естеством Бога Единого почитаем, Творца и Господа и Владыку всех.

И ныне, Богородичен: Тя дверь непроходимую, и Село невозделанное, и ковчег манну носящий, и ручку и свещник, и кадильницу невестственного угля, именуем Чистая.

Катавасия: Утренюем утреннюю глубоку ...,

Песнь 6.

Ирмос: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Сохранив цела знамения, Христе, * воскресл еси от гроба, * ключи Девы не вредивый в рождестве Твоем, * и отверзл еси нам райския двери.

Спасе мой, * живое же и нежертвенное заклание, * яко Бог Сам Себе * волею привел Отцу, * совоскресил еси всероднаго Адама, * воскрес от гроба.

Богородичен:

Возведесе древле держимое смертию и тлением, воплотившимся от Твоего пречистаго чрева, к нетленной, и присносущней жизни, Богородице Дево.

Сниде в преисподняя земли, в ложесна Твоя Чистая спедый, и вселивыйся и воплотивыйся паче ума, и воздвиже с Собою Адама, воскрес от гроба.

Ин. Преполовению

Ирмос: Яко воды морския:

Вся содержай концы, возшел еси Иисусе, и учил еси во святилици народы слову истины, празднику преполовившуся, якоже Иоанн вопиет.

Дело Отчее совершил еси, дела уверил еси словеса Твоя, исцеления совершая Спасе и знамения: разслабленного исправляя, прокаженных очищая: и мертвые воскрешая.

Безначальный Сын начало бысть, прием еже по нам вочеловечися, и посреде праздника учаше, глаголя: притецйте ко источнику приснотекущему, жизнь почерпите.

Богородичен: Деву по Рождестве поем Тя, Деву и Матерь славим, Тебе едину, Чистая Богоневесто Отроковице: из Тебе бо воистинную Бог воплотися, обновив нас.

Ин. самаряныни.

Ирмос: Да не погрузит мене буря водная, ниже пожрет мене глубина: отвержен бо есмь во глубины сердца морского зол моих. Тем зову яко Иона: да въздет от тли зол живот мой к Тебе Боже.

На кресте Тя беззаконнии пригвоздиша, и копием прободоша Христе, и Иосиф благообразный Тя погребе в новом гробе: из него же со славою воскрес, совоскресил еси Спасе, всю тварь поющую державу Твою.

Верей и врата Владыко, сильно сокрушил еси адовы, и воскресл еси яко Бог, и срет, радуйтесь, рекл еси женам, и сих рещи послал еси учеником: воста Живот, и виден бысть, просвещаяй концы.

Что плачете? Что носите яко смертному жены мвру? Воста Христос, вопияше древле блистаясь вельми, явлейся юноша, тпцы плащаницы оставив: шедше возвестите другом Его Востание.

Струя сый Господи жизни независтная, и бездна милости Блаже, путешествовав седиши близ кладязя клятвеннаго, и самаряныни вопиял еси: даждь ми воду пити, яко да примешу оставления воды.

Слава, Троицен: Пою Отца Безначальна, и Сына Сопрестольна, и Духа единосущна верно, Едино Существо, и Естество, и славу, и едино Царство Бога всех и Творца, Содержителя всего, со безплотными силами.

И ныне, Богородичен: Деву Едину рождшую, и утробу нетленную соблюдшу, поем Тя Чистая, Престол Господень, и дверь, и гору, и мысленный свещник, чертог всесветлый Божий, и сень славы яве, ковчег же и ручку и трапезу.

Катавасия: Снизшел еси в преисподняя земли ...,

Кондак, глас 8:

Подобен: Яко начатки:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышнее наследова вечно, яко приснославная.

Икос: Чистая таинства услышим, Иоанну нас учащу, в Самарии бывшая: яко жене беседоваше Господь, воду просив, Иже воды в сонмища их собравый, Иже Отцу и Духу сопрестольный: прииде бо ищый образ Свой, вечно яко Приснославный.

Песнь 7.

Ирмос: Отроки от пещи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Жены с миры богомудрыя * в след Тебе течаху: * Егоже, яко мертва, со слезами искаху, * поклонившася радующияся Живому Богу, * и Пасху тайную * Твоим, Христе, * учеником благовестиша.

Смерти празднуем умерщвление, * адово разрушение, * иного жития, вечного, начало, * и играюще поем Виновного, * Единого благословенного * отцев Бога * и препрославленного.

Яко воистинну священная * и всепразднственная сия спасительная ночь, * и светозарная, * светоносного дне, * востания сущи провозвестница: * в нейже безлетный Свет * из гроба плотски всем возсия.

Богородичен:

Умертвив Сын Твой смерть, Всенепорочная днесь, всем смертным пребывающий живот во веки веков дарова, един благословенный отцев Бог и препрославленный.

Всем царствуяй созданием, быв Человек, вселися в Твою Богоблагодатная утробу, и распятие претерпев и смерть, воскресе Боголепно, совозставив нас яко всемогущ.

Ин. Преполовению

Ирмос: Халдейская пещь ...,

Плотски потрудился еси, Упокоение всех, волею вжадался еси, Источниче чудес воды просил еси, воду жизни Иисусе возвещай.

Самаряныни Господи жене беседовал еси, обличая безумие беззаконных евреев: она убо верова Сына Тя быти Божия, сии же отвергошася.

Хлеб ядуще плоти Господни, и кровь приемлюще ребра Владычня, обновлением Духа да жительствуем, живуще благодатию.

Богородичен: Во чреве Твоем вместила еси Невместимое Слово, от Твоих сосец доила еси мірови Питателя, на объятии носила еси Творца нашего Богородительнице Чистая.

Ин. самаряныни.

Ирмос: Не предаждь нас до конца имене Твоего ради, и не разори завета Твоего, и не отстави милости Твоея от нас, Господи Боже отец наших, прпетый во веки.

Со беззаконными Христе щедре волею вменился еси, во время Божественных страсти: и сия сия видяще колебашеся земля, и камень вседетельным мановением распадался Непостижимо, и восташа мертвии иже от века.

С душею спешд во страны преисподния ада, возвел еси мужеством связанные вся, яже от века смерть прият, горький мучитель, вопиющий Тебе: Иисусе Боже, слава Твоему страшному смотрению.

С мертвыми что вы ищите Живущаго во веки? Воста, якоже рече: се якоже видите праздны плащаницы, истощен гроб, явлейся глаголаше муроносицам юноша: скоро спешите рцыте апостолом.

Вода еси жизни, вопияше Христу самаряныня: напой мя убо Слове жаждущую всегда Твоя Божественная благодати, яко да не ктому, Иисусе Господи, неведения содержуся зноем, но проповедаю Твоя величия.

Слава, Троицен: Отца и Сына, и Божественнаго воспеваем Духа, нераздельную Троицу естеством сущую, разделенну лица, едино Существо, срасленное, безначальное, Творца всех, и Бога: Егоже вси небеснии поют чинове.

И ныне, Богородичен: По Рождестве страшнем, Дева чиста сохранилася еси, Святая Богородице: темже ты вси ангельстии лица, и человечестии роди вси, немолчными воспевают гласы, Вместилище Чистое Невместимаго.

Катавасия: Отроки от пещи избавивый ...,

Песнь 8.

Ирмос: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

Приидите, новаго винограда рождения, * божественнаго веселия, * в нарочитом дни Воскресения * Царствия Христова приобщимся, * поюще Его * яко Бога во веки.

Возведи окрест очи твои, Сионе, и виждь: * се бо приидоша к тебе, * яко богосветлая светила, * от запада и севера, и моря, * и востока чада твоя, * в тебе благословящая Христа во веки.

Отче Вседержителю, и Слове, и Душе, * трети соединяемое во Ипостасех Естество, * Пресущественне и Пребожественне, * в Тя крестихомся и Тя благословим во вся веки.

Богородичен

Прииде Тобою в мир Господь Дево Богородице, и чрево адово расторг, смертным нам воскресение дара: темже благословим Его во веки.

Всю низложив смерти державу Сын Твой Дево, Своим Воскресением, яко Бог крепкий совознесе нас и обожил: темже воспеваем Его во веки.

Ин. Преполовению

Ирмос: Ангели и небеса ...,

Приидите видите людие, на престоле славы воспеваемого, от людей беззаконных хулимаго, и видяще, пойте во пророцех Мессию предреченнаго.

Ты еси воистинну Христос, в мир сей пришедый, из негоже спасение, и оставление отеческих согрешений, Ты еси воистинну Живот в Тя веровавшим.

Премудрость Божия, преполовившуся празднику, якоже писано есть, во святилищи предста, и учаше: яко воистинну Сей бяше Мессиа Христос, Имже спасение.

Богородичен: **К**ако родила еси, рцы, от Отца безлетно просиявшего, и со Святым Духом воспеваемого? Или яко весть Един Благоволивый из Тебе родится, Богородице.

Ин. самаряныни.

Ирмос: **В**сяческая Владыко премудростию составил еси, землю же паки утвердил еси, якоже веси, дно, основанием водрузивый на водах безмерных: тем вси вопием воспевающе: **благословите дела Господня непрестанно Господа.**

Смерть претерпел еси, Едине Безсмертне волею, ада пленил еси, врата медная стерл еси Царю Небесный, и отъял еси узники от века тамо сущия, воспевающия державу Твоя благости.

Вознеслся еси Долготерпеливе волею на древо, и камень распадется, и солнце угасе, и завеса церковная раздрася, и земля поколебася, и потрепета всепосмеянный ад, и вся узники рзреша.

Явился еси Господи, во тме сидящим, Свет сый Незаходимый, и Живот всех. Темже Тя яко виде правденых сонм, възграся Слове, и возопи: пришел еси вся от уз разрешити, поющия державу Твою.

Близ сел еси источника, в час Спасе шестый, и самаряныни воду живую подал еси, и разума воды за многое благоутробие. С неюже вси вопием воспевающе: **благословите дела Господня непрестанно Господа.**

Благословим Отца, и Сына, и Святаго Духа, Господа.

Троицен: **О**тца Безначальна, Сына Собезначальна поем, и Духа Святаго, Бога Единого Трое, неслиянна, непресекома, Содетеля всех, единосильную Державу, самовластную, и вопием: **благословите дела Господня, непрестанно Господа.**

И ныне, Богородичен: **У**глем очищается Исаиа, предпроведуя мысленнаго Угля, воплощаема Дево из Тебе паче мысли, опаляюща человекa вся вечныя грехи, и обожаяща за милосердие естество наше Всенепорочная.

Таже: Хвалим, благословим, покланяемся Господеву:

Катавасия: Сей нареченный и святой день ...

Честнейшую **не стихословится:**

Песнь 9.

Ирмос: **С**ветися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

О Божественнаго, о любезнаго, * о сладчайшаго Твоего гласа! * С нами бо неложно * обещался еси быти * до скончания века, Христе: * Егоже, вернии, * утверждение надежды имуща, радуемся.

О Пасха велия и священнейшая, Христе! * О мудросте и Слове Божий, и сило! * Подавай нам истее Тебе причащатися * в невечернем дни Царствия Твоего.

Богородичен:

Согласно Дево, Тебе блажим вернии: радуйся двере Господня: радуйся граде одушевленный: радуйся, Еяже ради нам ныне возсия свет, из Тебе Рожденного из мертвых Воскресения.

Веселися и радуйся божественная двере Света: зашедый бо Иисус во гроб возсия, просияв солнца светлее, и верныя вся озарив, Богорадованная Владычице.

Ин. Преполовению

Ирмос: Чужде матерем ...,

Празднику преполовляющуся иудейскому, возшел еси Спасе мой, во святилище Твое, и научал еси всех: чудяхуся же иудеи, и откуда Сей вестъ писмена не научився, глаголаху.

Исцеления дарований Избавитель мой источая, сотворяше чудеса и знамения, прогоня недуги, целя немощствующие: но иудеи бесновахуся множеством чудес Его.

Плотский иудей по плоти разумевай, помышляй писанная, писанием претывается, противу падает же паки Духом истины: мы же сие отринувше мудрствуем духовная.

Богородичен: Вместила еси во чреве Твоем Дево Мати, Единого от Троицы Христа Жизнодавца: егоже поет вся тварь, и трепещут горнии престолы, Того моли Всеблаженная спасти души наша.

Ин. самаряныни.

Ирмос: Сотвори державу мышцею Своею, низложи бо сильная со престол, и вознесе смиренныя Бог Израилев, в нихже посети нас Восток с высоты, и направил ны есть на путь мира.

Се виден бысть Живот всех Христос, повешен волею на древе: и сия видящи земля потрясая, и многа святых восташа яве телеса усопших, и узохранительница адова поколебася.

Красен из гроба яко Жених от чертога изшел еси, смерти разоривый мучительство Христе, и адовы веревы сокрушивый силою Божественною, и Востания Твоего, светом умным просветивый мир.

Поставим вси ныне лики духовныя, и да зовем: Господь воскрес, да радуется земля, да веселится небо, облацы да кропят нас правды тучы, празднующия светло и Христа поющим.

Жизнь живущих, источник благих Господь, богато источая воду учений, вопиет жене: подаждь ми воду пити, яко да подам ти воду, грехов твоих источники иссушающую.

Слава, Троицен: Свет един нераздельно, Трисолнечная Единица, Безначальный Отец, Сын, и Дух, Божество едино, Жизнь и всех Творец. Того воспоим вернии со безплотными, трисвятыми песньми священнословяще.

И ныне, Богородичен: Свету бывши жилище, Чистая, озари зеницы души моя, омраченныя многими козньми врага, и видети сподоби ясно от Тебе возсиявший Свет паче мысли, чистым сердцем.

Катавасия: Светися, светися

Екзапостилларий, Пасхи. Самогласен:

Плотию уснув, * яко мертв. * Царю и Господи, * тридневен воскресл еси, * Адама воздвиг от тли * и упразднив смерть: * Пасха нетления, * мира спасение. [Единожды]

Слава, самаряныни:

Подобен: Жены:

В Самарию пришел еси Спасе мой Всесильне, и жене беседовав просил еси воды пити, евреем воды источивый из камене несекомаго, юже к вере совосприял еси, и ныне жизни наслаждается на небесех вечно.

И ныне, Преполовению. Подобен:

Преполовившуся пришел еси празднику Человеколюбче во святилище, и глагола еси: жажды исполнению ко Мне приидите, и почерпите воду живую и питающую. Еюже пищи, и благодати, жизни же бессмертных насладитесь вси.

**На хвалитех, Всякое дыхание: поставим стихов 8:
и поем настояция стихиры воскресны, глас 4-й:**

Стих: Сотворити в них суд написан: слава сия будет всем преподобным Его.

Крест претерпевый и смерть, * и воскресый из мертвых, Всесильне Господи, * славим Твое Воскресение.

Стих: Хвалите Бога во святых Его, хвалите Его во утверждении силы Его.

Крестом Твоим, Христе, * от древния клятвы свободил еси нас, * и смертию Твоею * естество наше мучащаго диавола упразднил еси: * востанием же Твоим радости вся исполнил еси. * Темже вопием Ти: * воскресый из мертвых, Господи, слава Тебе.

Стих: Хвалите Его на силах Его, хвалите Его по множеству величества Его.

Твоим Крестом, Христе Спасе, * настави нас на истину Твою, * и избави нас от сетей вражних, * воскресый из мертвых, * возстави ны падшыяся грехом, * простер руку Твою, Человеколюбче Господи, * молитвами святых Твоих.

Стих: Хвалите Его во гласе трубнем: хвалите Его во псалтири и гуслех.

Отеческих Твоих недр не разлучився, * Единородный Слове Божий, * пришел еси на землю за человеколюбие, * Человек быв непреложен, * и крест и смерть претерпел еси плотию, * безстрастный Божеством: * воскрес же из мертвых, * бессмертие подал еси роду человеческому, * яко Един Всесилен.

Ины стихиры Анатолиевы, глас тойже:

Стих: Хвалите Его в тимпане и лице, хвалите Его во струнах и органе.

Смерть приял еси плотию, * нам бессмертие ходатайствуя, Спасе, * и во гроб вселился еси, * да нас от ада свободиши, воскресив с Собою: * пострада убо яко человек, * но воскрес, яко Бог. * Сего ради вопием: * слава Тебе, Жизнодавче Господи, * Едине Человеколюбче.

Стих: Хвалите Его в кимвалех dobroгласных:

Камень распадешся, Спасе, * егда на лобнем Крест Твой водрузися, * устрашишся адовы вратницы, * егда во гробе яко мертв положен был еси: * ибо смертную упразднивший крепость, * умершим всем нетление подал еси воскресением Твоим, Спасе, * Жизнодавче Господи, слава Тебе.

Ины самогласны самаряныни. Глас 3-й:

Стих: Наляцы, и успевай, и царствуй истины ради, * и кротости, и правды.

Да радуется днесь светло небо и земля, * яко Христос явился воплощаемъ яко Человек, * да Адама измет от клятвы всеродна, * и удивляется чудеса в Самарию пришед: * жене же беседоваше воды прося, * Иже облаки водами одевай. * Темже вси вернии поклонимся, * нас ради волею Обнищавшему, * благоутробным советом.

Глас 6-й: Стих: Возлюбил еси правду, * и возненавидел еси беззаконие.

Тако глаголет Господь самаряныни: * аще бы еси ведала дар Божий, * и Кто есть глаголай тебе, даждь Ми воды пити, * ты бы просила у Него, и дал бы ти пити, * да не вжаждешися во веки, глаголет Господь.

Слава, глас тойже:

Источник живоначала Иисус Спас наш, * ко источнику пришед патриарха Иакова, * пити пропаше воды от жены самаряныни. * Сей же неприобщительное иудеом прирекшей, * мудрый Зиждитель приводит ю, сладкими глаголы, * паче к прощению присносущныя воды, * юже и приимши всем пропева рекущи: * приидите, видите сокровенных видца и Бога, * пришедшаго плотию, за еже спасти человека.

И ныне: Препоблагословенна еси:

Славословие великое. И отпуст.

Слава, и ныне, стихира евангельская, глас 7-й:

Се тьма, и рано, и что у гроба, Марие, стоиши, * многую тьму имеющи в разуме, * в нейже, где положен бысть вопрошаеши, Иисус? * Но виждь срищущася ученики, * како плащаницами и сударем воскресение обретоша, * и помянуша яже о сих Писания. * С нимиже и имиже и мы веровавше, * воспевает Тя жизнедавца Христа.

И поучение Студитово, и час 1. И конечный отпуст.

НА ЛИТУРГИИ

Блаженна на 12, глас 4-й, на 4, и от канона самаряныни песнь 3 и 6, на 8.

Древом Адам рая бысть изселен; древом же крестным разбойник в рай вселися. Ов убо вкуш, заповедь отверже Сотворшаго; ов же сраспинаемь, Бога исповеда Таящагося, помяни мя, вопия, во Царствии Твоем.

Распныйся и воскресый яко Силен из гроба тридневен, и первозданного Адама воскресивый, Едине Безсмертне: и мене на покаяние обратитися, Господи, сподоби от всего сердца моего, и теплою верою присно взывати Ти: помяни мя, Спасе, во Царствии Твоем.

Воистинну воскресе Христос, и свидетельствует гроб к вам, законопреступницы: ибо гробная Своя оставль, воскресе тридневно. Камень запечатася, и пред гробом стражие предстояху: ад пленися, смерть умертвися, не украден бысть Христос: веруйте с нами Воскресению.

Воскресшаго из мертвых, и адову державу пленившаго, и видима женами муриносицами, радуйтесь, глаголющаго, вернии умолим, от исления избавити души наша, зовуще всегда разбойника благоразумнаго гласом к Нему: помяни и нас во Царствии Твоем.

Волею на древо вознеслся еси Слове, и зрящее распадохся камене, и тварь преклоняшеся вся, и мертвии из гробов, якоже от сна востаху.

С душею Тя пришедша ко аду, Слове, видевши вся души праведных, от вечных уз отрешахуся, песнословяще яже паче ума силу Твою.

Что чудитесь? Что во гробе вы ищете с мвром жены, Владыку? Воста, и мир совоздвиже, ангел блистайся муриносицам вещае.

Жизнь сый Господи, и Источник безсмертия, сел еси при источнице Щедре, и Твоих премудрых вод исполнил еси самаряныню просящую, и поющую Тя.

Что плачете? Что носите яко смертному жены мвра? Воста Христос, вопияше древле блистайся вельми, явлейся юноша, тпцы плащаницы оставив: шедше возвестите другом Его Востание.

Струя сый Господи жизни независтная, и бездна милости Блаже, путешествовав седиши близ кладязя клятвеннаго, и самаряныни вопиял еси: даждь ми воду пити, яко да приимеши оставления воды.

Слава, Троичен: Пою Отца Безначальна, и Сына Сопрестольна, и Духа единосущна верно, Едино Существо, и Естество, и славу, и едино Царство Бога всех и Творца, Содержителя всего, со безплотными силами.

И ныне, Богородичен: Деву Едину рождшую, и утробу нетленную соблюдшу, поем Тя Чистая, Престол Господень, и дверь, и гору, и мысленный свещник, чертог всесветлый Божий, и сень славы яве, ковчег же и ручку и трапезу.

По входе тропарь воскресен, глас 4-й:

Светлую Воскресения проповедь * от Ангела уведевша Господни ученицы * и прадеднее осуждение отвергша, * апостолом хвалящаяся глаголаху: * испровержеся смерть, * воскресе Христос Бог, * даруй мирowi велию милость.

И праздника Преполовления, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Слава, кондак самаряныни, глас 8-й:

Верую пришедшая на кладязь самаряныня, * виде Тяпремудрости воду, * еюже напоившись обильно, * Царствие вышнее наследова вечно, яко приснославная.

И ныне: Преполовения, глас 4-й:

Празднику законному преполовляющуся, * всех Творче и Владыко, * к предстоящим глагола еси, Христе Боже: * приидите и почерпите воду безсмертия. * Темже Тебе припадаем и верно вопием: * щедроты Твоя даруй нам, * Ты бо еси Источник жизни нашея.

Прокимен, глас 3-й:

Прокимен: Пойте Богу нашему, пойте, * пойте Царви нашему, пойте.

Стих: Все языцы восплещете руками, воскликните Богу гласом радования.

Апостол в Деяниях, зачало 28.

Во дни оны, разсеявшиися апостоли от скорби, бывшия при Стефане, приидоша даже до Финикии, и Кипра, и Антиохии, ни единому же глаголюще слова, токмо иудеем. Бяху же нецыи от них мужие кипрстии и киринейстии, иже вшедше во Антиохию, глаголаху к еллином, благовествующе Господа Иисуса. И бе рука Господня с ними: многое же число веровавшие обратишася ко Господу. Слышано же бысть слово о них во ушию церкви сущия во Иерусалиме, и послаша Варнаву преити даже до Антиохии. Иже пришед и видев благодать Божию, возрадовася и утешаше вся изволением сердца терпети о Господе. Яко бе муж благ, и исполнь Духа Свята и веры. И приложися народ мног Господеви. Изыде же Варнава в Тарс взыскати Савла, и обрет его, приведе его во Антиохию. Бысть же им лето цело собиратися в церкви, и учити народ мног, нареци же прежде во Антиохии ученики, Христианы. От ученик же, по елику кто имевше что, изволиша кийждо их на службу послати живущим во Иудеи братиям, еже и сотвориша, пославше к старцем рукою Варнавею и Савлею.

Аллилуиа, глас 4:

Наляцы, и успевай, и царствуй истины ради, и кротости, и правды.

Стих: Возлюбил еси правду, и возненавидел еси беззаконие.

Евангелие от Иоанна, зачало 12

Во время оно, прииде Иисус во град Самарийский, глаголемый Сихарь, близ веси, яже даде Иаков Иосифу сыну своему. Бе же ту источник Иаковль. Иисус же труждася от пути, сядяше тако на источнике: бе же яко час шестый. Прииде жена от Самарии почерпати воду. Глагола ей Иисус: даждь Ми пити. Ученицы бо Его отшли бяху во град, да брашно купят. Глагола Ему жена самаряныня: како Ты жидовин сый от мене пити просиши, жены самаряныни сущей, не прикасают бо ся жидове самарянех. Отвеща Иисус и рече ей: аще бы ведала дар Божий, и Кто есть глаголяй ти: даждь Ми пити: ты бы просила у Него, и дал бы ти воду живу. Глагола Ему жена: Господи, ни почерпала имаши, и студенец есть глубок: откуда убо имаши воду живу? Еда Ты болий еси отца нашего Иакова, иже даде нам студенец сей, и той из него пит, и сынове его, и скоти его? Отвеща Иисус, и рече ей: всяк пий от воды сея

вжаждется паки, а иже пиет от воды, юже Аз дам ему, не вжаждется во веки, но вода, юже Аз дам ему, будет в нем источник воды текущъ в живот вечный. Глагола к Нему жена: Господи, даждь ми сию воду, да ни жажду, ни прихожду семо почерпати. Глагола ей Иисус: иди, пригласи мужа твоего и прииди семо. Отвеща жена и рече Ему: не имам мужа. Глагола ей Иисус: добре рече, яко мужа не имам. Пять бо мужей имела еси, и ныне, егоже имаши, несть ти муж: се воистинну рекла еси. Глагола Ему жена: Господи, вижу, яко пророк еси Ты. Отцы наши в горе сей поклонилися: и вы глаголете, яко во Иерусалимех есть место, идеже кланяться подобает. Глагола ей Иисус: жено, веру Ми ими, яко грядет час, егда ни в горе сей, ни во Иерусалимех поклонятся Отцу. Вы кланяетесь, егоже не весте: мы кланяемся, егоже ведем, яко спасение от иудей есть. Но грядет час, и ныне есть, егда истиннии поклонники поклонятся Отцу духом и истиною: ибо Отец таковых ищет поклоняющихся Ему. Дух есть Бог, и иже кланяется Ему, духом и истиною достоин кланяться. Глагола Ему жена: вем, яко Мессиа приидет, глаголемый Христос: егда Той приидет, возвестит нам вся. Глагола ей Иисус: Аз есмь, глаголай с тобою. И тогда приидоша ученицы Его, и чуждахуся, яко с женою глаголаше. Никтоже бо рече: чего ищещи; или что глаголаше с нею? Остави же водонос свой жена, и иде во град, и глагола человеком. Приидите, и видите Человека, Иже рече ми вся, елика сотворих: еда Той есть Христос? Изыдоша же из града, и грядяху к Нему. Между же сим моляху Его ученицы Его, глаголюще: Равви, яждь. Он же рече им: Аз брашно имам ясти, егоже вы не весте. Глаголаху убо ученицы к себе: еда кто принесет Ему ясти? Глагола им Иисус: Мое брашно есть, да сотворю волю Пославшаго Мя, и совершу дело Его. Не вы ли глаголете, яко еще четыре месяцы суть, и жатва приидет? Се глаголю вам: возведите очи ваши, и видите нивы, яко плавны суть к жатве уже. И жнй мзду приемлет, и собирает плод в живот вечный, да сей вкупе радуется, и жнй. О сем бо слово есть истинное, яко ин есть сей, и ин есть жнй. Аз послах вы жати, идеже вы не трудитесь: инии трудишася, и вы в труд их внидoste. От града же того мнози вероваша вонь от самарян, за слово жены свидетельствующия, яко рече ми вся, елика сотворих. Егда же приидоша к Нему самаряне, моляху Его, да бы пребыл у них: и пребысть ту два дни. И много паче вероваша за слово Его. Жене же глаголаху, яко не ктому за твою беседу веруем: сами бо слышахом, и ведем, яко Сей есть воистинну Спас миру, Христос.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника безсмертнаго вкусите.

Другий: Хвалите Господа с Небес, хвалите Его в Вышних.

Служба святаго Минеи поется на Повечерии.

Подобает ведати, яко служба самаряныни поется 4 дни: в Неделю, в четверток, в пяток, и в субботу. В понедельник убо, и во вторник, поется служба Преполовению и в среду отдается: поем якоже и на самый праздник, кроме входа и чтений.

